

Ískrá er sjúkraskrárkerfi hannað á Heilsugæslu höfuðborgarsvæðisins til notkunar við skráningu upplýsinga í heilsuvernd skólabarna. Hönnuðir Ískrár eru Margrét Héðinsdóttir og Guðrún Ólafsdóttir hjúkrunarfræðingar hjá heilsugæslu höfuðborgarsvæðisins. Jens Ágúst Reynisson forritari kom hugmyndum á rafrænt form. Samúel J. Samúelsson yfirlæknir á Heilsugæslunni Mjódd kom að þeim þáttum sem snúa að læknisverkum og Georg Karonina fyrrverandi forstöðumaður deildar rafrænnar þjónustu hjá heilsugæslu höfuðborgarsvæðisins samræmdi og hélt utan um vinnuna.

Ískrá er notuð til að skrá upplýsingar um nemendur, heilsufarsleg vandamál þeirra, samskipti þeirra og foreldra/forráðamanna við starfsfólk í heilsuvernd skólabarna, forvarnir og fræðslu sem starfsfólk heilsugæslunnar lætur nemendum í té. Ískrá er einnig notuð til að halda utan um reglubundið eftirlit, fræðslu, forvarnir og skimanir sem starfsfólk heilsugæslunnar sinnir í skólum.

Við hönnun Ískrár var haft að leiðarljósi að hún yrði einföld í notkun og aðlöguð skólaumhverfinu. Þetta hefur tekist með því að nýta upplýsingar úr nemendaskrárm skólanna. Einnig hefur verið lögð áhersla á að notandinn hafi góða yfirsýn yfir bekki og árganga og stöðu vinnunnar á hverjum tíma, ásamt því að hafa góða yfirsýn yfir einstaklinginn og aðstæður hans.

Uppbygging Ískrár

Ískrá byggir á bekknum sem grunneiningu og raðar nemendum upp í bekki. Í “Bekkjarskrá” er yfirlit yfir allar reglubundnar skoðanir, fræðslu og skimanir sem framkvæmdar eru í heilsuvernd skólabarna í samræmi við lög, reglugerðir og tilmæli frá Embætti landlæknis sem í gildi eru á hverjum tíma. Úr bekkjarskránni eru þessi samskipti skáð með einföldum og fljótlegum hætti. Úr bekkjarskrá er farið í heilsufarskrá hvers nemanda eftir þörfum. Hluti af bekkjarskrá er einskona minnisbók fyrir notandann þar sem hann getur skráð minnisatriði og athugasemdir bæði um einstaka nemendur eða bekkinn í heild. Heilsufarskrá inniheldur öll gögn sem tilheyra tilteknum nemanda. Þar er yfirlit yfir allar reglubundnar skoðanir, ónæmisaðgerðir eða önnur samskipti nemandans við heilsuvernd skólabarna.

Til að opna Ískrá er tvísmellt á Ískrármerkið á skjáborðinu.

